



天 花 大 全


編者樓國榮

上海文書局印行

中華民國廿五年四月印刷
中華民國廿五年四月發行

天花大全 (全一冊)

每部定價國幣三角



編者樓國榮

發行者文明書局

印刷者文明書局

發行所文明書局

發行所
上海福州路
中華書局

分售處各埠中華書局

天花大全目錄

上篇

天花診治總論

天花發熱診治

天花出點診治

附調養法及
避忌須知

天花起脹診治

天花灌膿診治

天花收靨診治

天花結痂落痂診治

中篇

雜症當急治論

異痘四種診治法

天花夾癩診治

天花夾疹診治

天花夾痧診治

天花發泡診治

天花陷伏診治

天花倒靨診治

天花痛癢診治

天花腰痛診治

天花腹痛診治

天花腹脹診治

天花口唇有變診治

天花口舌有變診治

天花咽喉有變診治

天花咳嗽診治

天花痰涎診治

天花失音診治

天花譫妄狂亂診治

天花噎水吐食診治

天花中風診治

天花驚搖診治

天花倦怠診治

天花喘急診治

天花煩燥診治

天花口渴診治

天花不食診治

天花出汗診治

天花失血診治

天花嘔吐診治

天花瀉利診治

天花吐瀉並作診治

天花夾痢診治

天花寒戰咬牙診治

天花潰爛診治

天花陰囊發腫診治

天花落痂後浮腫診治

天花眼目有變診治

天花疔瘡口瘡診治

天花餘毒診治

下篇

古今經驗諸方一百餘種

每方附註解
及使用法

以上方藥及諸藥目錄在第三篇中

天花大全上篇

暨陽樓國榮纂

天花診治總論

天花之毒。既屬五臟。其根頗深。且難出難收。變化極速。故診治之法。當先注意其人之氣血強弱。及痘毒之淺深。時氣之寒燠。自發熱之初。見點之時。卽須觀形察色。逆料如何起發。如何灌漿。如何收靨。一着手用藥。就顧全首尾。慎初善後。加意斟酌。然後次第調理。分其表裏虛實。寒熱虛者補之。實者瀉之。寒者溫之。熱者清之。無過溫過清。不妄瀉妄補。要在使其正氣不損而氣血盛。邪氣不留而痘毒解。夫痘或有不必要用藥者。有宜輕劑者。宜重劑者。皆須細心詳審。一一分辨。斟酌施行。斯可收萬全之功。而免生意外之

變。如痘發熱之後。作三四次出。有大小。有先後。起發亦作三四次。先出者先起。後出者後起。大者自大。小者自小。大小次第而起。及至養漿。則先起者先作漿。後起者後作漿。大小亦如之。磊落分明。不相粘連。色極紅潤。不帶火色者。順症也。不必施治。若庸醫射利。以爲不用藥。無以見功。欲妄投藥劑。幸邀天功。不知治天花。惟有補瀉二法。其症既順。則無邪正之偏。補則助其火邪。瀉則損其正氣。是所謂痘無症。藥之而反生其症也。何能成功。徒殺人耳。若險症。則宜急治。治之不急。致險症變爲逆症者。有之。時醫用藥。因無把握。恐變症不已。憚而不用。坐視險者變而爲逆。全不顧也。心何忍乎。是又以不用藥而殺人也。至于逆症。往往棄而不救。恐費其調治。不能成功。徒招謗也。要知逆症雖屬九死一生。然醫者抱濟

世之志亦宜於不治中尋其治法。或能挽回生機。未可定也。今將天花順症之次序及逆症之變化。一一詳說于後。并附治法。俾醫者有所參考焉。

天花發熱診治

天花必發熱而後出者何也。蓋天地之育萬物。雖賴土以生息。土不得陽氣薰蒸於下。安能發生萬物。人身一小天地也。天花之管紐在脾。脾屬中土。若非火蒸透膈。則其毒安能震動而發泄。古語云。五穀不逢熱不結。痘瘡不熱透不徹。所以天花之毒。蘊伏五臟。欲出則必薰蒸而發熱。是以書云。熱蒸三日而癩生。蓋天花本火毒。待熱而發。故熱微則毒微。熱甚則毒甚。而痘之稀密輕重係焉。雖然。亦有熱甚而毒不甚者。如熱甚不煩不渴。大小便如常。精神

清爽。此熱在表。其裏無邪。毒火發越。則痘易出。而易成功。毫無危險。亦有熱微而毒不微者。蓋其熱雖微。而煩躁不安。大小便頗難。昏昏喜睡。此係毒火內蘊。不得發越。表熱雖微。內熱則甚。如毒火鬱遏之極。痘必出之不快。而難成功也。故熱微毒微。熱甚毒甚。此言其常。熱微毒不微。熱甚毒不甚者。又言其變也。治天花者。正當於此。有所斟酌。時醫每當發熱之時。往往以發散清解為主。使邪熱盡退。不知天花初出。本不帶火色。若一失其治。則痘帶火色。而出後紅必變赤。赤必變紫。紫必變黑。救無及矣。或云。外感厲氣。內有所傷。與痘毒合并發熱者。當清解之。若天花之正熱。其毒稟於胎元。伏於五臟。深藏久蓄。一旦觸發。倏然忽然之頃。其勢猛銳。勃欲出。斷不可遏阻其勢。必藉血氣。載毒外出。俟痘出而熱自退。

或熱退而痘自出矣。若必以發散清解。令熱盡退爲說。純用涼藥。則血氣凝滯。不能載毒外出。反將內攻而告變也。奚可哉。今領前人之論。不敢執定不用清涼。以不用藥而悞事。亦不敢執定純用清涼。又以用藥而害事。因病施藥。隨症定方。一一如左。

天花發熱。與傷寒不同。因風寒之症。邪自外入。陽氣拂鬱而發熱。患者惡寒。怕露頭面。且只見一經形證。天花之症。毒自內出。陽氣薰蒸而發熱。患者惡熱。喜露頭面。且五臟之症俱見。呵欠、煩悶、肝症也。乍涼、乍熱、手足涼、脾症也。面躁、腮赤、咳嗽、噎噴、肺症也。驚悸、心症也。飖涼、耳冷、腎之平症也。再觀心窩有紅色。耳後有紅筋、赤縷。或身熱、手指皆熱。惟中指獨冷。男左女右。凡發現是種症候。乃確斷其爲天花。惟初發熱時。身熱和緩。時熱時退。神清氣爽。飲食

二便如常。無雜症者。或吐瀉不甚。而隨止者。發驚搖後。卽見痘影者。又自汗而汗不大者。此乃營衛氣和。腠理疎通。順症也。不必施治。

天花當初發熱時。卽增寒壯熱。頭痛咳嗽。鼻流清涕者。多由於外感。切不可驟用發散。當視其人身體強弱。以調治之。如身體強壯者。用升麻葛根湯⁽²⁾加桔梗、蘇葉、川芎、山查肉、牛蒡子、各等分。又生薑三片。共煎熱服。蓋被取汗。如身體怯弱者。可用參蘇飲⁽³⁾去木香、枳殼。加牛蒡子、山查肉各一錢。使微汗之。然不可令汗出太多。發虛其表。致後難起。脹收靨也。如汗後身熱不退者。且勿峻攻。姑稍待之。其或煩悶燥渴。兼有妄語者。用敗毒和中散⁽⁴⁾治之。如腹痛大便秘者。可加酒炒大黃微利之。

天花身熱至二三日之後。欲出不出。或現煩悶驚搖。及狂言亂語之狀者。切不可惶恐失措。須詳審虛實寒熱以治之。要知此等症。皆由毒氣在內。不得發宣於外而作。然毒氣壅內。不得宣發之症。亦有三種。最宜精詳。須觀形察色。審聲問症。又參之以脈。然後詳細辨別。如痘影紅紫。聲音不亮。手足發熱。脈見洪數者。此毒氣壅盛於內。不能驟發於外。而致驚搖狂躁。狀頗危險。可用清解散⁽⁵⁾以宣發之。則狂亂漸除。神氣自清矣。如痘影紅紫如前。但覺聲重鼻塞。或鼻流清涕。脈見浮數者。此係內毒本盛。又外爲風寒所侵。致鬱滯不得出。而現驚搖狂躁。宜用蘇解散⁽⁶⁾以宣發之。則狂亂自平矣。又或痘影澹然。浮在皮下。不見紅活。面色青白。脈見遲緩者。此係血氣虛弱。不克載毒外出。而致驚搖狂躁。宜用溫中益氣

湯(7)以宣托之。凡此三者。皆須審辨明晰。而後對症施藥。則一劑之後。其效通神。自然痘出而驚定矣。昔人謂天花未出。而發驚搖者。爲順症。不知是在一二日之間也。若至三四日。則不可忽矣。庸醫每見小兒發熱驚搖。不悟其爲天花。竟有悞作急驚風施治。或單投以寒涼之劑。或用驅痰峻藥下之。致兒頃刻而斃。豈不可惜。推求其故。蓋因阻遏其毒。使不得外出。而致內攻告變也。故小兒當未出天花。或未種牛痘之先。若遇此種症候。卽當注意。恐係天花也。

天花當初發熱之時。如其熱雖輕。但至三四日。而昏昏嗜臥。不思飲食。及見點之後。痘影淡白。顆粒不明者。此非痘毒稀少。亦係血氣虛弱。不能載毒外出。急宜用溫中益氣湯(7)以托之。其甚者。且

必連服三四劑。痘始出齊。若因其熱微靜臥。而袖手玩視。不急用藥。則五六日後。毒氣內攻。瞬息告變。不可救也。古人謂熱輕毒輕之說。豈可執一而論乎。

天花有發熱至數日。而不見出者。此時進退二難。欲大發之。恐其毒本稀。致成癰爛。不發之。又慮無以宣其毒。恐滯於內。而告變。此時當先用升麻葛根湯⁽²⁾以微發之。若微發不出。則宜加藥。(即加重分兩。非另加別藥也)如加藥再不出。則用惺惺散⁽¹⁰⁾加防風、川芎、薄荷各一錢。以大發之。俟大發之後。所出不多。即知其毒本稀。不可再發也。

天花初熱時。若發生妄語。或見神見鬼者。此乃毒氣內攻。心神不清所致。最爲危險。宜急用導赤散⁽¹⁰⁰⁾外加連翹、黃芩、犀角、木通。

導赤散本以生地爲君、木通爲附、此處須加重木通爲君、故再書之。琥珀、抱龍丸。惟大便秘結者。可用牛黃清心丸。(8)或粉紅丸。(9)治之。服藥後神氣清爽者。可治。如狂亂不退。則無救矣。天花發熱後。如失血由口鼻出者。宜急用童便。磨犀角服之。若小便溺血者。乃不治之症也。

天花出點診治

天花出點者。卽發熱後痘出而見其形也。形出而色亦見焉。形色既見。則吉凶攸分。治天花者。宜於此時觀形察色。詳細分辨。則後日起脹與灌膿之能否順手。已可逆覩矣。要在預相其機。而圖之早。若因循失治。一經變化。便難措手。故起脹之症。不必至起脹時而後議也。正當於出點時。預相其能起脹。不能起脹。而先理之。蓋

天花當熱透見點之時。初出之象。其狀如粟。色紅而潤澤。與無痘處之皮膚迥異。惟其紅非深紅。特淡紅之異於皮膚之不紅耳。且自血肉而達皮膚。其根甚深。分三四次出盡。先一次出者。約過十餘小時。則頂現尖形。體積漸大。此時二次者又出。再過十餘小時。亦漸成尖形。體積亦漸大。於是繼續而出。大小不一。磊落分明。此時審辨其形。則知後日之能起不能起。窺察其色。即知後日之能灌不能灌。此乃治天花之第一節要也。患者亦當自此以後。謹慎調養。注意避忌。茲將天花期內。應避忌者。詳列於后。

(附)天花之調養及避忌須知

天花用藥。既須謹慎。然調養尤屬緊要。不能疎忽。如寒暖不勻。食物亂投。則變端立起。後悔無及。不可不知也。故當天花既出之後。

內臟空虛。熱氣一蒸。毛孔俱開。急宜謹避風寒。凡衣被等。勿令其過煖。勿令其過寒。雖天氣炎熱時。亦不可令其赤身露體。或單衣當風。天氣嚴寒時。不可令其重綿疊褥。致熱氣壅遏。室內空氣須流通。并吸引陽光。使溫度適宜。患者所用碗箸等。皆須用消毒水。煮洗。衣被等勿與他人相混。以防傳染。其患者親屬。不論長幼。皆宜速種牛痘。以避其毒。又患者臥床及四壁。最好用胡荽酒(43)噴射。臥席下能多鋪胡荽更佳。因此物能助痘發生。至西醫所用硫磺消毒法。噴射室內。雖殺病菌。然其氣頗烈。不宜於痘。故不適用。又自見點至收靨。室中最好燒避穢香(12)至飲食方面。勿令過飽。勿令過飢。勿食生冷。勿食辛熱。凡一切雞肉、豬肉、牛羊肉、魚腥等。及葱、蒜、酒、醋、蜜、荔枝、棗、柿皆不宜食。蓋因雞肉動風。豬肉動痰。羊

肉助熱。魚腥助火。牛肉則易黑癍。故也。至若荔枝、酒，又能發癢。棗、柿、蜜，其味甘甜，引痘入眼。醋酸而損齒。葱、蒜，則泄氣。所以皆當屏除。切勿輕食。至一切穢氣，尤須避忌。茲分述於下。

(一) 婦人月經氣 (二) 閨房淫液氣 (三) 腋下狐臭氣 (四) 行遠勞汗氣 (五) 糞溝惡濁氣 (六) 諸瘡腥臭氣 (七) 硫黃蚊烟氣 (八) 吹滅燈燭氣 (九) 誤燒頭髮氣 (十) 葱韭大蒜氣 (十一) 煎炒油膩氣 (十二) 醉酒暈腥氣 (十三) 毛骨焚燒氣 (十四) 麝香燥穢氣

以上諸氣皆須避忌。不能觸犯。至室內又須禁忌掃地揚灰。及移撞器物。高聲談話。又勿使生人往來。蓋天花禁忌。實較無論何症爲重也。故以上諸端。自出點至收靨。悉宜遵之。至飲食等且須忌至二十禮拜。方保無慮。

天花當初出時。如口鼻兩旁。人中上下。腮耳之間。先見二三點。淡紅而潤澤。然後挨次而出。分三四次出盡。且皮厚堅硬。以手摸之。頗覺礙手。又無三五相連者。此順症也。不必施治。如初出時。太陽太陰。額角髮際。及天庭方廣之處。先見四五點。熱尙未退。帶火而出者。此難治之症也。

天花正出之時。如其人精神爽健。色氣光晶。年壽明潤。印堂黃光。大小便如常者。無論天花稀密。必無變症。不必施治。若其人精神倦怠。氣色昏黯。雖天花甚稀。當時時詳察。防有變症。如稍有變化。宜急急設法施治。切勿遷延怠緩。否則一二次後。症勢已成。則難救矣。

天花有發熱三四日。或四五日而始出者。且所出之點。其形堅實。

而皮厚。其色明潤而鮮豔。此乃榮衛調和。內毒盡洩。不必施治。若發熱一日或半日。卽一齊湧出。且所出之點。頭帶焦黑色。其皮甚薄者。此逆症也。當急設法施治。其治法分二種。頭現焦黑者。宜用涼血化毒飲(13)治之。色白皮薄者。宜用固陽散火湯(14)去荊芥穗生地二味。外加茯苓白朮各一錢治之。則其色轉紅矣。天花既出之後。如發熱不退者。是因毒盛。而其人之氣血又盛。所以能逐毒外出。惟色呈紅紫。不分地界者。逆象也。當急退其熱。法用清地退火湯(16)治之。則其熱自退。否則血氣被其煎熬。所出之痘。必漸變爲焦枯之色。或竟釀成黑陷。異變迭起。救無及矣。

天花見點之後。三四日間。本當盡出於外。而無稍留於中。此時凡脚心手心。俱現痘點。則出齊矣。身體微溫。不熱不寒。若微熱亦無

妨。惟身發大熱。痘影紅紫乾枯者。宜急用調元化毒湯(24)去參芪治之。如色光潤者。不必施治。

天花發熱後。如鼻塞聲重。咳嗽頭痛。四肢拘急。常喜覆被。而惡風寒。出不快者。此乃感冒風寒。毒閉於內也。當分氣體之強弱。各施其治。如其人血氣壯盛。皮厚肉密。一旦爲風寒所襲。毒氣難於發越。致發熱後。而出不快者。宜用雙解散(19)去石羔滑石。加紫草治之。如其人形體怯弱。風寒易感。以致腠理閉塞。氣血凝滯。而出不快者。宜用惺惺散(10)去細辛。加防風荆芥薄荷治之。

總之天花之出點。自有一定期限。如過期應出不出。或出不快者。卽有所因。惟其病症不同。當詳細審辨。按症施治。托其內毒。助其發洩。方保無慮也。

天花起脹診治

天花起脹者。卽天花發熱出點之後。勃然呈起發之勢也。此爲天花第三期。此時先出點者先起脹。後出點者後起脹。能肥脹一分。則胎毒發出一分。如其點盡肥脹。則胎毒亦盡出。起脹時。痘之根脚。湧現紅色。又如鋸齒。其顆粒。當放白光瑩。毫無凝滯之狀者。是乃氣血交會。氣升血附。具後日行漿灌漿之基。若有不然。是又其變也。治天花者。當於此時觀形察色。則後日漿之能灌不能灌。能足不能足。皆可逆觀矣。宜預相其機。及早補救。若於此失治。必待漿之不能灌。不能足之時。而始救之。則無及矣。蓋天花爲症。其膿最重。膿見則毒洩。故有膿則生。無膿則死。膿足則易靨。不足則倒靨。且諸症必相繼迭出。所以起脹之時。當預爲相機補救。極關重

要也。今將起脹時。種種變化及治法。詳列於后。

天花當起脹之時。先出者先起脹。後出者後起脹。此時如顆粒尖圓光澤。其根鮮紅肥胖。其人飲食二便如常。神清氣爽。未夾他症者。順象也。不必施治。

天花當起脹時。如灰白頂陷。皮軟不厚。根盤血散不聚。光白不榮者。此乃血氣二不足也。宜急用保元湯(25)加丁香、當歸、川芎治之。天花起脹時。如頂長大尖圓。而根盤之血不聚。色不紅活者。此乃氣至而血不榮也。宜用當歸活血湯(26)加陳皮治之。如色雖紅潤。而其形平陷皮薄者。此乃血至而氣不充也。宜用四君子湯(81)加黃芪、肉桂治之。

天花起脹時。以尖圓爲貴。如四圍突起。中心平陷者。此分二症。皆

屬逆象。其一因血化成水。致四圍高起。中心略低者。俗呼茱萸痘。此乃中氣不足。發未透徹故也。但胃強能食者無妨。至養漿時。或充滿而起。不必施治。如胃弱少食者。宜急扶中氣。用參苓白朮散⁽²⁹⁾治之。其一四邊沸起。中心陷落無水。猶是死肉。形如錢者。此名鬼痘。急宜用九味順氣散⁽²⁷⁾加山查肉治之。若稍遲緩。則漸變黑點。不可救矣。

天花起脹時。有中心凸起。四邊乾平無水。或裏紅外黑者。此係平日感受風寒。皮膚堅厚。致毒鬱而不散。宜用桂枝葛根湯⁽³¹⁾或十宣散⁽³²⁾外用水楊湯⁽³³⁾浴之。便愈。

天花起發。貴透四肢。如遍身起發。而四肢不起者。此脾虛之故也。蓋脾主四肢。一經虛弱。則不能行其津液。灌溉四肢。所以發遲。宜

用黃芪建中湯(35)治之。如四肢痘上。發出水泡者。又肝木乘脾土也。當先瀉其肝。用羌活湯(36)加柴胡主之。後補其脾。用參苓白朮散(29)去葛根加肉桂主之。

天花起脹時。如頭面隨之腫大。惟痘色紅活。磊落分明者。此內毒外達之機也。待膿成收靨。則腫漸消。可不必慮。有頭面腫且目閉者。此痘密毒深之故。皆不必慮。待瘡熟腫消。而目自開矣。

天花當未起脹時。若頭面先腫。皮光色豔。狀如瓠瓜者。此係惡毒之氣。上冲頭面。最爲危險。古醫俱稱不治之症。宜於初腫時。急用羌活救苦湯(38)多服之。或能挽回。未可知也。

天花當正起脹之時。如發現頭面連目腫脹。而天花反停止不脹者。此乃血氣虛弱。致不能拘攝其毒。以成膿。故其毒散漫於肉分。

而頭面發腫。但皮色尙未光滑如瓠瓜之狀者。宜急用參歸大補湯(95)主之。使大補氣血。以收攝其毒。則痘自起脹。而腫自消矣。天花起脹之時。如有一處焦枯不起。其周圍肉大如盃口。或較盃口爲大。且其根下肉現紫色。以銀針按而搖之。不甚活動者。此毒氣留伏壅遏。結滯而不發越之故也。宜急用胭脂塗法(30)令熱塗之。則皮肉活動。焦枯漸退。此症如不急治。將轉變不已。或竟至全身天花。變成陷伏之症者有之。卽不然。後日必爲癰毒。切宜慎之。天花起脹後。其形色以紅活肥潤爲佳。發時如有變黑者。最爲危險。庸醫乏術治療。往往棄而不救。不知天花變黑。亦分數種。有可救者。有不可救者。當分別診察。不能一概抹殺也。若因循失治。則可救者。亦變成不可救。竟坐視其斃。於心何忍。茲將救治之法。及

變化之狀。詳列於后。

一、天花當起脹時。忽有一二顆變黑。以手摸之。則甚痛者。此痘疔也。宜用四聖散(40)塗之自愈。

一、天花起脹時。如有數顆乾黑。脚根堅硬者。宜急用四聖散(40)塗之。若塗後皮肉不活。根脚不腫者。則不可救。

一、天花起脹時。有數顆變黑。其後遍身如此。漸至四圍有水。中心黑陷者。宜急用涼血解毒湯(42)救之。

一、天花起脹後。有因毒氣太盛。煎熬氣血。不能送毒盡出。致已出者。反入於裏。且頓現黑色者。此因毒氣壅滯於內。宜急審其大小便。若祕而腹脹煩燥者。先下之。如小便祕者。則獨利小便。蓋毒雖入裏。皆可從瀉而出也。如仍枯黑不起者。可急用無價散。

(五)以解裏邪。則毒漸出而黑白退矣。總之天花起脹。關係於後日之灌膿收漿。最爲重要。治者須察其變化而預爲救補。可發則發。可下則下。可利則利。或解表。或解裏。皆當隨機應變。不拘常法。庶不悞人命焉。

天花灌膿診治

膿者。血之變也。血化爲膿。毒從膿化。天花至此。漸成實矣。然成實之次序。亦分行漿。漿足。漿老。三期。行漿者。氣血交會。氣盈血附。其毒自化。且根脚之紅色。當起脹時。如鋸齒之狀者。此時又變而爲如紅絨花蓋之狀。鮮豔可愛。其根盤周圍皆血。不淡不散。此血上潮。因而漿行。上潮五分。則漿至五分。上潮十分。則漿至十分。俟膿足之後。色白肥滿。血歸根底。其血緊緊斂附於根下。周圍成一紅

圈而無外布之勢。宛然一顆珍珠。坐於胭脂上也。然天花不能一齊而皆如此。必先起脹者先灌。後起脹者後灌。如先起者已上潮至五分。則後起者方行漿。先起者已至十分。則後起者方至五分。亦如起脹時。分三四次而始灌足。膿足之後。根脚紅活。則先灌者先變爲黃潤之漿。其色蒼蠟。是漿老之狀也。於是後灌者亦挨次而如之。此灌漿之順症也。不必施治。其有不然者。卽灌漿之變症。宜急設法補救。因症調治。茲將灌膿之變化。及治法。一一詳列於後。

天花當灌膿時。如其色淡白。疱不尖圓。根無暈紅者。乃氣虛而血縮也。必不成膿。宜急用參歸鹿茸湯(56)內千金內托散(57)治之。天花灌膿時。如色紅紫乾枯。或帶焦黑者。此乃毒熾而血凝之故。

也。亦不成膿。宜用清毒活血湯(58)活之。天花至起脹灌膿時。如光澤可觀。以手摸之。皮軟而皺。其毒雖化。而漿未滿。或中央猶有未成漿者。是氣血虛寒。不能振作之故也。宜急用保元湯(25)加乳酒。以助其漿。

天花當灌膿時。雖有行漿之狀。而灰白不滿。欲成倒塌。皮薄易破者。亦宜用保元湯(25)加酒調治之。

天花當灌膿時。如猶是空殼者。此氣載毒行。血不附氣。毒蘊於血也。蓋血既不至。則毒猶伏於血中。而不出。宜急用內托散(55)加人乳黃酒共煎服之。則膿自灌而毒自洩矣。

天花當灌膿時。如有漿而清薄。或已成水。清淡灰白。不能作漿。此乃氣血俱虛之故也。蓋所有之水。係初時一點血氣解而爲水。非

自內漸出之水也。宜用鷄冠血酒治之。則漿自作矣。法用三五年以上大雄鷄。先將黃酒一盃煮溫。然後刺鷄冠血滴入和勻。再煮溫熱服之。雖燥痛一時。亦能自愈。

天花正當作膿之時。如外感風寒。肌覈閉塞。血凝不行。而不灌膿者。急宜溫散。用桂枝葛根湯(31)加防風白芷治之。如毒氣太盛。內外蒸爛。血氣被其煎熬。而不作膿者。宜用連翹湯(46)治之。大便秘者。用牛李膏(47)治之。

天花灌膿時。如因內虛。而不能使陽氣以副榮衛。且其人停止飲食。或嘔或厥。而不作膿者。宜用陳氏木香散(49)或異功散(50)治之。天花灌膿時。如咯唾痰涎。稠粘濃結。咽喉不利。飲食亦少者。此乃肺受火邪。津液不足。以致痰粘稠濃。結於喉舌之間。宜急用甘桔

湯(63)加天花粉主之。切不可妄用太涼之劑。否則痰壅毒滯。變成逆症。不可治矣。

天花如顆粒稠密。而其人體質怯弱。或係小兒。氣血有限。致不克盡成膿漿。因而發出水疱與膿疱者。此理之常也。若未夾他症。不必施治。其餘諸症。俱載在雜症類中。

天花收靨診治

天花至收靨。其毒盡解。其功告成矣。若出點後調養得法。治無失宜。則此時顆粒肥胖。膿滿堅實。而無破爛浸淫。以手摸之。瘡頭微焦硬者。卽欲靨之狀也。然收靨亦貴有先後。有次序。且疾徐合中。先灌膿者先靨。後灌者後靨。亦分三四次。相挨而成功。初時其膿漸乾。現蒼蠟色。或葡萄色。先從口鼻兩旁。或面部收起。漸至胸腹

而下。挨次靨滿結痂。遂至剝落。內症全無。身體輕快。飲食二便如常者。順象也。或手足心。或手指尖。或陰上先收者。亦吉。如人中先收者。更吉。至髮際以上。陽中之陽。謂之孤陽。足膝以下。陰中之陰。謂之孤陰。此二處每遲留後靨。亦不必慮。惟毒太盛而未解。元氣太虛而未補。或補之太過。或解之太過。治失其宜者。又有內傷外感。觸犯雜氣。調養不得法者。則發生種種變化。急宜設法補救。茲將治法。一一開列於後。

天花至九日十日之間。膿漿滿足。色現蒼蠟者。此時必發熱薰蒸。俗名燒漿。又謂之乾漿。蓋真陽運化。其水自消燦而收靨矣。若及時回漿。當靨不靨。其人身涼。而手足冷。脈來沉遲者。此元氣不足。虛寒之症也。急宜大補氣血。以助其收結。法用回漿散(72)治之。則

靨自收矣。

天花當收靨時而不靨。其人身熱手足熱。脈來洪數者。此因發熱薰蒸而不靨。毒氣未盡解也。宜急退其熱。則靨自收矣。可用清表散毒湯(70)或甘露回天飲(68)治之。

天花當靨而不靨。反流漿不已者。此因表過。則癰爛流水。或飲水多。則漂蕩流水。皆宜用除濕湯73。治之。外用敗草散64。敷之。則流漿自止。而靨自收矣。

天花當收靨時。如天氣炎熱。過求溫煖。致被熱氣薰蒸。而不收靨者。宜服五苓散。桂雖辛熱。但能化氣助其收靨。惟分兩極輕。是在用者按症施量。故不刪去也。況此處係被熱氣薰蒸所致。非內有實熱者可比。(75)并減去衣被。使其清涼。則靨自收矣。

天花收靨時。或因大便秘結。內外極熱。毒氣散漫。無陰氣以斂之。

而不收靨者。宜內服宣風散(77)外用敗草散(64)敷之。或因瀉泄氣虛。脾胃弱。肌肉虛。而不收靨者。內服陳氏木香散(49)外用敗草散(64)敷之。或因發渴。飲水過多。以致水漬脾胃。濕淫肌肉。而不收靨者。宜用五苓散(75)治之。

天花成膿後。過期不靨。以致潰爛。膿汁淋漓。不能着席。粘惹疼痛者。用蕎麥粉(79)以絹袋裝包。向身上撲之。若遍佈席上。襯臥尤佳。天花如初時。服熱藥過多。以致熱毒猖狂。因而不收靨者。宜用小柴胡湯(78)治之。

天花當漿未稠膿。頂未飽滿。瘡脚散開。色白皮破。乾燥焦枯。似靨非靨者。此津液枯竭。氣血虛少。內症未除之故也。宜急用四君子湯(81)救之。

天花之症。原不大順。故發後全身之點。有極好者。有參差不齊者。至收靨時。好者先靨。宜看其次序。或自面部至手內。及二足踝。皆有靨者。卽能全靨。其餘參差不齊者。雖遲幾日無妨。此俗名謂之花靨。不必施治也。

天花結痂落痂診治

天花至結痂落痂。已告完滿。惟其次序。亦如灌膿收靨時。分三四次相挨而落。其色在收靨時。爲蒼蠟色。或葡萄色者。至此漸黑而厚硬。隨結隨落。其癍微紅。鮮明光瑩。無赤黑。無凸凹者。上吉也。有漿老。而頂皮嫩薄。堆起一尖狀。如攢餛包。其周圍之皮漸皺。膿漸乾。所結之痂。其色微黃。稍待則其色變黑而焦硬。隨結隨落者。有漿老。而周圍之皮皆焦硬。呈瓦灰色。見者莫不驚疑。後其膿漸乾。

結痂甚厚。而灰色俱變黑色。隨結隨落。竟無恙者。有膿血時。痘與皮平。全無痂狀。至十餘小時後。皮漸堆起。結痂甚厚。隨結隨落。竟無恙者。醫者不可不知。然有應落不落。以致綿延日久。或落而不齊者。此宜詳細辨明。而速治之。蓋天花之後。氣血虧損。虛火易熾。如因循失治。恐生他症。茲將落痂時。不能順遂者。一一詳列於後。附以治法。

天花如結痂日久。當脫不脫者。在胸背手足則無妨。惟面上不脫。甚爲可慮。蓋毒聚於陽會也。宜用大連翹飲(83)治之。外以百花膏(66)潤之。

天花結痂後。如深入肌肉。而不脫落者。用百花膏(66)潤之。天花結痂雖乾好。但半邊掀起。半邊不脫落者。宜用升麻葛根湯。

(2) 加防風荆芥連翹治之。

天花瘡痂落後。如癍肉凸起。非常作癢者。宜荆芥敗毒散(85)治之。

天花瘡痂落後。如癍肉紅紫者。乃毒盛血熱也。宜用清涼解毒湯(42)治之。

天花當痂落之後。如心中煩躁。夜不安眠者。宜用竹葉石膏湯(87)治之。但應病則止。不可多用。

天花痂落後。如其癍甚白。以手拭過。不見血色者。此血不足也。不治。雖過四十日。或一月之後。亦必死。其故因漿淡。且結痂薄。所以癍白。若膿漿充足。必無此症也。其餘一切雜症。及落痂後。因餘毒未淨。而發生諸症。名曰餘症。皆載在第二篇中。

天花大全中篇

暨陽樓國榮纂

雜症當急治論

天花之症。惟有氣滯、血熱、毒盛、氣虛、血虛、毒壅、諸症盡之矣。自此以外有異痘。又有雜症。或痘症發而雜症鬱積於內者。亦有與之俱發者。有因外感者。有因內傷者。有因穢污觸犯而雜症生者。皆宜急急治之。何也。蓋天花始終賴氣血以成功。人之一身。乃有限之氣血。故雜症添一分。則氣血因之虧損一分。氣血虧一分。則於痘上增一分病矣。况痘症有定限。而雜症無定期。古人云。治雜症一寸。則痘症落後一丈。洵有見之言也。治天花者。不可不知。

異痘四種診治法

天花當發熱之後。急宜加意診察。時刻留心。如其人氣血虛弱。或內毒壅盛者。卽易發生變化。名爲異痘。頗爲危險。一經發現。急宜設法診治。尙可挽回。若玩忽遲延。必致不救。茲將異痘四種症狀及治法。分述於下。

1. 蒙頭天花 頭乃諸陽之會。若天花見點時。各處稀少。而頭額獨多者。謂之蒙頭。宜急用胭脂塗法(30)治之。如痘有半漿。形稍尖圓。而此處尙平者。宜急用升天散(97)治之。倘治失其時。則諸陽獨亢。精華自萎。救之已無及矣。

2. 抱鼻天花 當天花見點後。如面部各處俱稀少。而鼻梁左右獨密如蠶種者。名曰抱鼻。此蓋毒聚於脾胃也。其症甚危。宜急用胭脂塗法(30)治之。庶可求生。

3. 鎖口天花 當天花見點時。如面部俱稀。而嘴角有一粒黑痘。較諸痘獨大者。名曰單鎖口。若兩嘴角發現二粒。名曰雙鎖口。皆惡候也。宜急用銀針挑破。再以官粉點之。切不可令此痘先脹先灌。致難救也。

4. 鎖項天花 頸項者。咽喉之管束也。咽乃胃脘水穀之道路。主納而不出。喉乃肺脘呼吸之往來。主出而不納。且頸項者。又陰陽之道路也。三陽之脈。自頸而上。三陰之脈。自頸而還。故此處貴稀少。若各處勻朗。而纏項出者。獨稠密太甚。名曰鎖項。宜急用甘桔湯(63)治之。則可免咽喉腫塞。如治失其時。必至廢其管束。阻其道路。使內者不出。外者不入。經云。出外廢。則神機化滅。升降息。則氣立孤危。致使音啞水滄。壅塞而斃。可不懼乎。

天花夾癍診治

天花出後。如忽現形如雲頭而突起。色赤成片而無顆粒者。謂之夾癍。蓋癍乃血之餘也。其源因係毒火鬱遏。煎熬陰血。血熱相搏。致浮遊之火。散漫於皮膚之間。與天花相夾。而發之於外。其形片狀如錦紋。宜急用升麻葛根湯⁽²⁾治之。若養漿時。而發癍者。與夾癍不同。乃係血熱不解。浮於肌肉。散於皮膚。致成爲癍。若結痂之後發癍者。此乃餘毒而發也。宜用解毒散⁽¹⁰⁴⁾主之。如有爛處。宜用生肌散⁽⁶¹⁾敷之。終之癍發七日之前。多宜表散。七日之後。多用解利。慎在得中。若延滯日久。則血液乾枯。痘難成功矣。

天花夾疹診治

天花當見點後。忽間有顆粒細密如麻子者。此夾疹也。其源因係

痘毒之發。被風寒壅閉腠理。濕蒸火熾。觸動腑毒。故與天花並出也。蓋天花麻疹二者。皆胎毒也。但所受有深淺之殊。而所發有臟腑之異。天花出於臟。麻疹出於腑。臟屬陰。乃爲積受之地。其受毒最深。腑屬陽。爲傳送之所。其受毒尙淺。故天花之始終。每以二旬日爲限。麻疹之消長。一晷時而已。豈可不從其急。而先其治乎。經曰。急則治其標。所以宜先散其疹。而後治其痘。法用升麻葛根湯。②加防風荆芥主之。如疹不散。則痘必不起。疹散則痘勃然而興。莫之能禦矣。若不先散其疹。而妄治之。則使疹邪留滯於肌表。痘旣不起。且有煩悶喘亂之患。若疹散之後。痘起綻凸。勻朗紅潤者。則其勢吉矣。如疹雖散。而痘起稠密。平塌灰白。紫滯者。其勢亦險也。故曰。痘夾疹者。半重半輕。實非順症。不可忽視也。

天花夾痧診治

痧與疹。或謂皆麻之異名也。故麻疹或稱痧子。實則痧含水而疹無水。痧之形。如粟一般。尖圓而硬。中含清水。天花出後。忽夾痧粒者。亦熱毒之所致也。當及早診治。法用四苓散(69)主之。則其痧自退。如玩忽輕視。不加治理。必生他變。不可不慎也。

天花發泡診治

天花發泡。肺熱也。肺主皮毛。熱毒在肺。傳於皮膚之間。故因而發泡也。發時如係紫泡、血泡者。宜急用加味清肺飲(105)治之。則肺熱清而毒自除矣。如係白泡。亦用前方。惟外加酒炒黃芩治之。則自愈矣。

天花陷伏診治

伏者毒蘊於裏。而不出也。陷者毒出而復入也。此二者皆係惡候。不可輕視。伏惟一症候。於見形之後。應出齊之時。其人熱不減。且煩渴悶燥。而痘頂又不尖者。此係伏毒。未盡出也。宜急用表裏清解之藥。以助其發洩。則伏者自起矣。陷有數種。曰血陷、紫陷、黑陷、灰陷。是也。如痘稠密、紅紫而頂陷者。曰紫陷。若紫陷失治。則或轉而爲黑陷。頗爲危險。其故因毒熱熾盛。閉其氣。凝其血。而致陷也。治法用清毒活血湯(58)主之。當其紫陷時。不過一二劑。而痘立起。奏效如神。及至黑陷。則毒已深入。便非此方所能救矣。宜用雞冠血(37)和酒灌之。外用胡荽酒塗其遍身。并衣服薰蒸之。亦有用壁間喜蜘蛛。如荳大者。研爛入雄黃末。用酒調服。如痘稠密。其色淡白。根無紅暈。而頂陷者。乃白陷也。若白陷失治。則或轉而爲灰陷。

矣。其故因氣血虛寒。不能運化毒氣。使之成漿。而致陷也。治法用參歸鹿茸湯(56)治之。又有一種痘。其頂頭顆粒通紅成血泡。而不成漿者。此乃氣虛不能統血。致血妄居氣位也。宜急補其元。培其氣。則此泡卽轉白而成漿矣。如血泡失治。則氣愈虛。而變成血陷。治愈難矣。按血陷與紫陷相類。但血陷雖紅。然淡而不紫。氣粗身熱者。紫陷也。卽其泡當時暫紅。亦必變紫。氣弱身涼者。血陷也。其色雖紅。得補必轉白。而成膿矣。醫者不可不辨也。

天花倒靨診治

陷伏倒靨。皆天花之險症也。倒靨之症。在天花見點後。如一二日。細小。四五日漸大。頂平。至六七日根脚漸闊。頂愈平陷。且其色金。白。形如荳殼者。乃倒靨也。有膿清不滿。其已成痂者。只是嫩皮。未

成痂者。俱潰爛不收。亦是倒靨也。然皆係氣血不足所致。故宜用參芪等培補其元。其有瀉泄者。急止之。便秘者。急通之。如爲穢氣所觸。而倒靨者。用加味四聖散⁽¹⁰⁷⁾主之。大凡天花至當靨時期。而不靨。反復入於裏。全無痂形者。皆謂之倒靨也。如其人元氣素弱。飲食失序。且大便久祕。竟致腹脹喘呼者。此乃毒盛薄蝕元氣。復入於裏。宜急下之。如毒入裏。忽然自利者。此係脾胃素強。毒氣難留。故致自利也。如利下水穀者。則不可救。利下膿血者。不宜驟止。蓋利盡血自能愈也。

天花痛癢診治

經曰。諸痛爲實。諸癢爲虛。又曰。火盛則痛。火微則癢。當天花初出時。痛者。實發未盡也。旣出稠密而痛者。乃毒盛血瘀之故也。宜用

四物湯(93)加連翹、丹皮、荊芥、防風治之。若頭痛發熱咳嗽者。宜用參蘇飲(3)治之。如熱氣上攻。痰壅頭痛者。可用二陳湯(109)治之。或感冒作痛者。用升麻葛根湯(2)加蟬脫羌活主之。如收靨時痛甚者。頗覺難治。天花方出而身癢者。如係初見紅點。遍身作癢。此係邪氣欲出。而皮膚閉密。致其火游移往來。故癢也。宜急發之。使皮膚縱緩。腠理開通。則邪氣得洩。痘出而癢自止。所謂火鬱則發之是也。有養漿時。淡白平塌。少食便溏。漿清而癢。抓爬不寧者。此係脾胃弱。而氣血俱虛也。宜急用十全大補湯(28)治之。則癢自退矣。有漿收斂時。而作癢者。此乃膿成毒化。邪氣盡解。正氣漸復。榮衛和暢。故癢也。與瘡癤將痊而癢者同。可不必服藥。有因穢氣觸犯而暴癢者。宜用避穢香(12)加小棗、茶葉、火燒熏之。則癢自除。有因

風寒所感而發癢者。亦如前法薰之。有無所因而忽癢者。當察痘形如何。如痘乾而癢者。宜急養血潤燥。如四物湯(93)等治之。如痘濕而癢者。宜急補氣除濕。用四君子湯(81)等主之。大凡痘癢。俱是惡候。要其人精神清爽。體溫適度者吉。若悶亂不寧。搖舞狂言。且雙手爬抓。不聽禁止者。凶象也。頗覺難治。

天花腰痛診治

天花發熱後。若現腰痛。亦惡候也。蓋腰者腎之府也。經云。太陽所至爲腰痛。因足太陽膀胱經。爲十二經之首。其脈俠脊抵腰中。入循脊絡腎。痘毒起於腎。循足太陽膀胱散於諸經。乃邪由裏傳於表也。如初發熱時。其腰卽痛者。此乃邪由膀胱直入於腎。腎部虛損。邪火亢盛。致不能勝邪。毒乃乘腎而腰痛也。宜急解毒。以瀉少

陰之邪。發表以通太陽之經。使邪氣不得入。而熱毒得漸解。然後調理氣血。培補真元。其症自愈矣。若治之少緩。則太陽之邪。由表以傳於陽。少陰之邪。由裏以傳於陰。表裏受病。陰陽俱傷。榮衛之脈不行。臟腑之氣皆絕。或變爲黑陷。或竟爲癢塌。則莫能救矣。

天花腹痛診治

腹痛一症。屬寒者多。惟天花腹痛。皆屬熱毒。古語云。發熱肚中痛。癰瘡腹內攻。故發熱便腹痛者。此乃毒氣鬱於腸胃而內攻也。治宜用桂枝大黃湯⁽¹¹²⁾主之。若發熱腹痛。且大便自利者。用黃芪建中湯⁽³⁵⁾主之。有因停食作腹痛者。與毒氣作腹痛。其症不同。蓋停食痛者。其痛多急疾。而啼叫必甚。且多在臍上。面現青白。唇淡。手足冷。至毒氣痛者。其痛稍延緩。忽痛忽止。多在臍下。或竟連腰而

痛。或色紅而唇紫。手足不冷。此兩者必辨別明白。方可用藥。切宜慎之。按痛在臍以上屬太陰。痛在當臍屬少陰。痛在少腹屬厥陰。皆毒氣鬱遏之故也。

天花腹脹診治

天花初出而腹脹者。乃毒氣聚於腸胃。不能發出。或少發外而反入內也。甚者氣喘發厥。如痘出之後。腹脹瘡無血色。或變紫黑者。亦是腸胃所聚之毒氣。不能盡發於外也。當急治之。若治之稍緩。多至不救。法宜升發解利。使毒氣分消。則脹自愈矣。故曰。痛隨利減。脹以利消。非虛言也。有因脾熱大便秘而生脹者。可用枳壳散⁽¹¹⁵⁾治之。如小便赤胃熱生脹者。可用四聖湯⁽¹¹⁶⁾主之。亦有乳食停滯而致腹脹者。宜用平胃散⁽¹¹⁴⁾治之。終須先察致病之由。然後按

症施藥。方不至有誤也。

天花口唇有變診治

口唇爲脾之竅。經曰。六腑之華在唇。故天花始終以唇口紅潤爲吉。若唇口腫硬。或唇口燥裂者。乃毒火乘脾。毒壅於中。則熱熾於外也。宜急用升麻葛根湯⁽²⁾加梔子防風治之。如熱甚發渴者。再加石膏以解其毒。使脾毒解。則能約束津液。化生氣血。可無虞也。如或痘出稠密。唇口瘡子相連。形成乾黑。且諸處未起。而唇口先已黃熟。或現腫硬者。此死症也。頗難救治。惟有用胭脂塗法⁽³⁰⁾試之。或能於九死一生中挽回一二。未可知也。又或諸痘未收。而唇口先已焦黑。其唇剝落。層層如紙。且口中涎如膠粘。口臭不可近身者。皆難治之症也。

天花口舌有變診治

口舌與五內相通。故毒熱之發。口舌先受。毒盛則口舌或紫、或白、或黑、或腫。此皆實熱之症也。宜用加味犀角湯(137)治之。或舌舒出口。以手弄舌者。舒舌。脾熱也。弄舌。心熱也。或曰。舌爲心之苗。舌舒出口。反說脾熱。何也。蓋脾之絡在唇。脾熱則唇焦。故舒舌以飭其唇也。四肢皆屬脾土。以手弄舌。反說心熱。何也。蓋舌者心之苗。心熱則舌脹。以手弄舌。乃心役之也。然。此在醫者之詳察。古語云。醫者意也。當先會其意。而後施藥。庶不至誤。

天花咽喉有變診治

咽者。胃腕水穀之道路。喉者。肺腕呼吸之門戶。故咽喉司呼吸。主升降。乃一身之鎖籥也。若痘毒不能發舒於外。遂至衝逆於此。忽

然腫痛。呼吸不能。飲食難入。或竟至啞。急宜察其毒之輕重。用甘桔湯(63)加減治之。則自愈矣。

天花咳嗽診治

凡有聲無痰謂之咳。有痰無聲謂之嗽。有痰有聲謂之咳嗽。咳嗽者肺症也。天花當發熱之初。便有咳嗽者。因肺爲五臟之華。天花之火。挾君相二火。上薰乎肺。肺氣焦舉。故氣逆而咳也。或至於嗽。宜用參蘇飲(3)去參治之。卽感冒風寒而致咳嗽者。亦可用此方主之。如或天花既出。忽而咳嗽者。此係喉間有痘。致淫淫如癢。習習如梗。阻礙氣道而咳嗽也。俟痘收自愈。不須施治。若天花收靨後而咳嗽者。此乃衛氣虛弱。腠理疏開。風寒外襲。肺氣上逆。故咳嗽也。宜用補氣潤燥除熱清膈之劑治之。則榮衛自和。肺金自清。

而咳嗽愈矣。

天花痰涎診治

痰涎者。津液之所結也。人身之津液。所以滋生精血。若變成痰涎。則精血日耗。便成病矣。故痰涎多者。非佳兆也。今西醫於診治肺癆等症。往往化驗痰涎。藉斷症候之輕重。與所含微生蟲之多寡。頗爲準確。天花當起發後。如因毒氣壅遏。致有礙於津液之道。使津液不得流通。胸膈閉塞。因作痰涎者。宜急用二陳湯(109)加前胡、枳殼、瓜蒌仁、石膏治之。則胸膈自開。而痰涎自消矣。

天花失音診治

音者。心之聲也。心氣上達於肺。而作音。肺清則音清。肺熱則音啞。天花起發後。如熱毒閉塞肺竅。遂至失音。宜急用甘桔湯(63)治之。

不可延緩。否則恐生他變。則治理愈難。悔無及也。

天花譫妄狂亂診治

譫。多言也。妄。虛妄也。譫妄者。妄有見聞。而語言無倫也。皆邪氣熾盛。正氣虛弱。神識不清之所致也。如天花發熱時。譫語者。此乃毒邪犯心。心爲熱冒。其神浮越。宜急用瀉火清毒之劑。或牛黃清心丸等治之。亦有胃熱便秘。三五日未便。而致譫語者。宜用清胃活血。養陰通利之藥治之。則表裏皆和。譫妄自停。如天花至成漿欲靨之時。忽然神昏譫語者。此由痘出稠密。精血外耗。不能養神。宜急用養血清火安神丸₍₁₂₎治之。如妄有所見。狂亂不寧。指神指鬼。恐佈昏昧。衣被不斂。言語不避者。此乃神志俱喪。軀殼徒存。不過苟延殘喘。決難救治也。

天花噎水吐食診治

凡水入則噎。食入則吐者。多由痘毒壅塞咽門之故也。蓋咽門司納飲食。通口入胃。今爲毒所壅塞。致飲水不得入咽。乃溢入喉門。喉司氣之呼吸。通於鼻而統於肺。乃至清至虛者。有形之物。不容毫末。今水入喉門。故氣逆噴出而噎也。食入則吐者。因咽門傷則門戶隘塞。食物不能直奔於胃。若緩則汨汨而下矣。蓋穀食有渣滓。自能入咽門而下。非如水溢以犯氣道也。若咽門壅塞。則阻而吐出矣。宜用甘桔湯(63)緩緩咽之。則吐者自愈。但此症見於七日之前者難治。因熱毒壅塞。不能盡行肌表也。見於七日之後者。如係咽門有痘。隨外部諸痘而生長。致壅塞道路。飲食不順者。可不必要憂虞。俟外部諸痘收靨後。則此痘亦漸自愈矣。又或舌上潰爛。

破如蜂窠。且舌痛強硬。不能活動。致水入則噎。食入則吐者。亦不必急。俟痘收靨後。則舌爛自平。然此皆失於預治之故也。否則安有此患哉。故曰。治天花者。宜預察其機而圖之早也。

天花中風診治

天花熱則生風。亦如中風之狀。或手足腰項強直。目呆口張舌硬者。宜急用參蘇飲⁽³⁾治之。如有痰加元明粉治之。但起脹後若現是症。頗覺危殆。多致不救也。

天花驚搐診治

驚搐者。口眼喎斜。手足搐搦。隨作隨止也。是天花出於心。驚搐亦出於心。蓋天花本係熱毒。如熱氣擊動心神。肝不能制。因心屬火而惡熱。肝主風而善動。天花之火生於心。心移熱於肝。風火相搏。

故發爲驚搖也。當天花未出時。此其常候。是以俗呼驚痘。最吉者。以牽引伸縮。骨節開張。腠理疏解。內寓發散之義。痘出而其驚自止。若痘出後。發不止者。可急用升麻葛根湯(2)加牛蒡子荊芥治之。或用牛黃清心丸(8)治之。切不可誤投涼藥。蓋心遇涼則氣血隨斂。致毒無從出也。如天花出後而患此症。由熱毒之未解耳。若風火相搏。喉中痰鳴。目睛上視。面赤貪飲。喜居冷處者。宜急用柴苓湯(121)治之。并兼服抱龍丸(123)薄荷湯下。若天花收靨後發搖者。此乃真氣虛弱。火邪內攻也。宜急服氣血雙補清火鎮神之劑。并兼用抱龍丸治之。

天花倦怠診治

倦怠者。神氣本弱。爲熱所蔽。致精神不能舒暢也。然不可專以熱

治亦不可專以虛治。宜清熱助氣爲主。如起脹後倦怠嗜臥。或竟聲啞者。喉舌必有疳蝕。須急視之。緩則誤矣。

天花喘急診治

喘急者。呼吸不相續也。有虛喘。喘必微。氣息短而無力。有實喘。喘聲粗大。而氣息且長。要皆熱毒壅遏。肺金受制而然也。經曰。五臟之氣。皆統於肺。肺爲氣主。居至高之分。喜清虛而惡填實。若爲邪氣所犯。則肺竅窒塞。發而爲喘也。如天花初發熱。或初出時。有噴嚏。鼻流清水而喘者。此風寒客肺也。宜用參蘇飲⁽³⁾治之。有傷食穀氣。蒸而爲熱。上乘於肺作喘者。宜平胃消食之藥治之。有吐後而喘者。此胃虛不能制伏相火。致火熱上衝而然也。有瀉後而喘者。此乃元氣下陷。虛火上擁。下氣不續。脾氣不足而然也。宜用補

氣補血之藥主之。有因痘密以致鼻塞、氣阻、而喘者。雖似喘、實非喘也。不必施治。

天花煩燥診治

天花始終以安靜爲吉。但有煩燥。必生變症。當詳察明辨。而急調治。夫煩者。擾擾而不寧也。燥者。憤憤而不快也。合而言之。乃昏亂不安之狀也。然皆係毒火壅盛。則金熾而水涸。故曰。火入肺則煩。火入腎則燥。又曰。煩向心生。燥從腎發。總由心火熾盛而起。如天花盡出。且已起發而煩燥者。乃血熱毒盛也。宜用牛黃清心丸(8)治之。如天花養漿時。而忽現煩燥者。當先辨其虛實。療之。若痘頂平淡。漿不易充者。乃氣血不足也。宜急補氣血。若痘形紫滯。便秘溺澁者。乃正氣足而毒盛不解。宜急用清涼解利之藥治之。若自

利不止。而煩燥者。宜用陳氏木香散(49)治之。如神識昏迷。反覆顛倒者。此熱甚於裏也。宜用導赤飲(10)合牛黃清心丸(8)治之。如日中煩燥。夜則安靜者。此陽盛於晝。至夜則陽退而安靜也。宜用化氣生津解熱止渴之劑治之。如日中安靜。夜則煩燥者。此陽氣陷入於陰。夜則陰盛。致陰陽交爭。故煩燥也。宜用補血之藥治之。若天花倒靨。喘脹悶亂。而煩燥者。此正氣虛脫。毒火壅盛。不治之症也。

天花口渴診治

天花發渴者。裏熱盛也。蓋三焦者。水穀之道路。津液者。水穀之精華。水穀入胃。賴消化作用。變成津液。流行三焦。以灌溉於臟腑也。天花之火。既起於內。銷燬水穀。使不得變化津液。灌溉臟腑。故發

渴也。如天花初發熱時。而大渴者。裏熱甚也。宜用葛根解毒湯₍₁₂₆₎治之。如能食而渴者。肺熱也。因毒火亢盛。心火上炎。乘於肺金。薰蒸焦膈。煎耗津液。故致發渴。治在上焦。宜用補氣生津。解熱止渴之藥治之。如不能食而渴者。脾虛也。因胃受水穀。化生津液。藉脾運行。以灌五臟。今脾土虛弱。不能爲胃行其津液。故致發渴。治在中焦。宜用參苓白朮散₍₂₉₎治之。有自利而渴者。乃邪傳腎也。蓋腎屬少陰。主五液。其脈絡於肺。通於舌。邪傳於腎。則下元失其鎖鑰。故致自利。自利則津液下走。腎水乾涸。不能上潤乎舌。因而大渴也。治在下焦。宜卽溫之。如異攻散₍₅₀₎等劑。有因天花稠密。津液外洩。化爲膿漿。不能滋養真氣。而致渴者。乃常病也。不必施治。

天花不食診治

天花始終以脾胃爲主。故能飲食者。則能受水穀之氣。化生津液。灌溉五臟。榮養血氣。滋潤肌膚。痘可賴以成功。若不能飲食者。必須詳察明辨。分別施治。如係瀉泄。痘色灰白。而不食者。此脾胃虛。而元氣弱也。宜急用四君子湯(81)治之。如係大便秘。痘現紅腫。而不食者。此毒盛而血熱也。宜急用四物湯(93)加酒炒大黃微利之。切勿誤投他藥。慎之慎之。

天花出汗診治

汗乃心之液。由熱氣內蒸。腠理開張。熱隨氣出也。故自汗汗出。則津液受傷。無以滋養肌膚。未漿之時。恐不能灌。既灌恐不能靨。既靨恐血脫陽虛。變爲他症。甚可慮也。宜急用補氣和中之藥治之。使氣升則血附。並略加白芍浮小麥以斂之。則汗自愈。若微汗則

不必慮。是陰陽氣和。榮衛通暢。邪氣不留。易出而易解也。可不必施治。若痘已收靨。痂皮脫落。忽然自汗者。頗爲危險。蓋痘至此時。邪氣盡解。元氣未復。氣血正虛。易生他變。宜急補陽救陰。使氣無外洩。則內自固也。

天花失血診治

血屬陰也。所主在心。統化在脾。藏納在肝。宣布在肺。輸泄在腎。灌溉一身。滋養百脈。諸經由此而生毓焉。然血之所通同者氣也。故曰氣主煦之。血主濡之。是以氣行則血行。氣止則血止。氣溫則血滑。氣寒則血凝。夫天花一症。始終賴氣血以成功。若氣血不傷。不寒不熱。則天花自順。始則送毒外出。而見形起發。繼則化毒成實。而灌漿收靨。若毒火熾盛。薰灼於內。迫血妄行。隨火而動。或上逆

而吐衄。或下注而便出。此皆惡候也。蓋氣血先病。痘何所藉以成功。故諸失血。惟鼻衄血者可救。其餘皆死症也。因鼻中衄血者。係毒氣上冲於肺。肺主皮毛。開竅於鼻。血自此竅而出。是血載毒行。毒氣外洩。不犯其內。所以可治。宜用清肺湯⁽¹²⁹⁾治之。其血立止。

天花嘔吐診治

有聲有物謂之嘔。有物無聲謂之吐。又有所謂乾嘔者。乾猶空也。明其無物。而有聲也。此症皆屬於胃。係熱毒壅塞胃口所致。如天花初發熱正出時。而見嘔吐者。此火邪犯胃。致氣上逆。不可驟止。俟稍待不止者。可用二陳湯⁽¹⁰⁹⁾加薑炒黃連治之。如出見至收靨而嘔吐者。乃係痘集咽門。攻於胃脘。吞嚥不利使然也。宜加味鼠粘湯⁽¹³⁷⁾治之。如傷食嘔吐者。亦二陳湯治之。惟外加山楂、神麩、枳

實。以消其食。則嘔吐自愈矣。

天花瀉利診治

經曰。陽氣在下。則生滲泄。蓋積熱之氣。不得上升。注而爲下泄也。又曰。濕勝則濡泄。按天花瀉利者。如未出而利。是因邪氣併於裏。腸胃熱甚。而傳化失常也。宜用柴苓湯⁽¹²¹⁾治之。如天花已出而利。是邪氣併於表。正氣方逐邪氣而外出。正氣主乎表。而不主裏。則裏氣虛。不能停納水穀。故自利也。宜用四君子湯⁽⁸¹⁾治之。利久不止者。可煎四君子湯。送下豆蔻丸⁽²⁰⁾治之。如脾胃怯弱。精神倦怠。不食而瀉者。虛也。宜溫養之。如身熱中滿。不食而瀉者。實也。宜清利之。惟成漿之時。最忌瀉利。因前此爲病未久。脾胃尙強。足以任之。今則病久。津液已衰。脾胃已弱。若復瀉利。則僅存之氣。重竭於

內方張之毒不能成於外。勢必變症百出。宜急止之。否則欲救無及矣。又痘有當靨不靨。毒復入裏。致倒靨而自利。且利有水穀者。此死症也。頗難救治。

天花吐瀉并作診治

內經曰。嘔吐暴注。皆屬於熱。蓋三焦爲水穀傳化之道路。毒火內迫。傳化失常。而吐瀉并作。因火性燥動。迅歛故也。又曰。邪在上焦則吐。邪在下焦則瀉。在中焦則吐瀉并作。但不可驟止。吐瀉中有疏通之義。使毒氣從上下分消。無壅遏也。故吐瀉稍待而不止者。宜用平和疏通升提發散之劑。俾引毒達表。則吐瀉自止矣。若以吐瀉爲裏虛。而遽用補藥。是以實投實。而反增其壅遏也。然此係專

爲天花發熱初出未透時而言之。若漿正行之時。或漿既足之後。而吐瀉者。乃脾胃虛弱也。宜急急施治。方能免內虛倒靨喘脹之患。可用四君子湯(81)兼豆蔻丸(20)治之。若係身受寒邪。口食寒物。脾胃停滯。致吐瀉因寒而作。且痘色灰白。手足厥而寒戰咬牙者。險象也。頗難診治。大約起脹灌膿時。不宜久吐瀉。如初出時。或收靨後。尙可稍待。而後診治也。

天花夾痢診治

赤痢屬血。自小腸來。白痢屬氣。自大腸來。此皆濕熱鬱於腸胃。致傷氣血而然也。天花始終以氣血爲主。若被熱所傷。卽生變化。故有痢當急治之。如治之不早。後悔無及。不可不慎也。當天花起發後。若大便膿血下腸垢者。此係濕熱鬱於腸胃。宜急用阿膠住車。

丸⁽¹³⁴⁾治之。如兼小便赤澁。而煩渴下痢者。宜用導赤散⁽¹⁰⁰⁾治之。大凡治痘痢。宜注重清利解毒。切不可遵無積不成痢之說。而專行破積也。

天花寒戰咬牙診治

寒戰者。森森然若寒。而振振搖動也。咬牙者。上下片牙相磨。而作聲也。方書云。氣虛則寒戰。血虛則咬牙。單見者生。雙見者死。故此二症。天花中所不宜有。所以諸家之說不一。有以寒戰咬牙。專主肺胃者。以謂肺熱則寒戰。胃熱則咬牙。有以寒戰咬牙。專主心肝者。則曰。諸風振掉。皆屬肝木。寒戰而振振搖動。風之象也。火氣冲物亦然。錢氏曰。肝主風。虛則咬牙。又曰。上竄咬牙。心熱也。以此想之。痘毒蘊於五臟。痘自五臟而發。症則隨臟而見。寒戰咬牙。或不

專主於一二經。當隨成就之序。觀形察色辨症。然後的確而施治焉。如天花發熱初出時。而寒戰者。乃其人衛氣素虛。榮血亦弱。不能逐毒外出。使毒邪留滯經絡中。欲出不得出。邪正相爭。故致振振然搖動者。火之象也。似寒而實熱。宜用柴葛桂枝湯⁽¹³⁶⁾治之。如天花正在外出。爲寒邪所襲。致症候與上相似者。亦宜柴葛桂枝湯治之。如天花稠密。掀發腫痛。經脈因痛而時時振搖寒戰者。不必施治。待膿成痛去。則自安矣。又有肉潤筋跳。似寒戰者。是因天花稠密。經絡之血。爲瘡所耗。不能榮養肌肉。主持筋脈。故惕惕然手足自搖。潤潤然膚肉自動。與他寒戰不同。宜用十全大補湯⁽²⁸⁾治之。養其氣血。則自愈矣。若養漿時寒戰者。乃陰凝於陽。陽虛則陰入氣道。因而作戰。宜急補氣溫陽之劑治之。若養漿時咬牙者。

乃陽陷於陰。陰虛則陽入血道。因而咬牙。宜急補氣益陰之劑治之。然以上言寒戰咬牙。單見之診治也。若二症並見者。則當審經絡。分虛實。辨寒熱。然後着手診治。不能徒用上法也。如痘色紅赤。或紫黑。且身熱煩燥。惡熱作渴。大便秘。小便赤澁。而寒戰咬牙者。此實熱也。因陽明胃熱則咬牙。太陰肺熱則寒戰。宜急用培補氣血。清熱通利之劑治之。如痘色淡白。或青色。或皮薄頂陷。身涼而靜。且惡寒不渴。大便利。小便清長。而寒戰咬牙者。此虛寒也。因胃氣虛寒則咬牙。肺氣虛寒則寒戰。但此寒非寒涼之寒。乃虛寒之寒。係寒生於虛也。宜急用參芪桂薑等藥溫補之。則二症自平。蓋寒戰咬牙二症。乃天花中之雜症最劇者。莫過於此。然其間有屬險而可救者。有屬逆而不可救者。因痘毒蘊於五臟。自內達外。由

筋骨而達於血肉。由血肉而達於皮毛。當痘出長之時。正由筋骨而達於血肉之時。肝主筋。脾主肌肉。心主血。血則徹筋骨肌肉而共灌者也。如此時寒戰咬牙而呵欠者。肝也。險象也。如寒戰咬牙而目上竄者。心也。亦險象也。當痘至灌膿之時。正由肌肉而達於皮毛之時。脾主肌肉。肺主皮毛。心主血。則徹肌肉皮毛而共灌者也。如此時而寒戰咬牙者。心熱也。皆火動之象也。險也。當痘至膿老收漿之時。正功成之際。如此時痘色黑而寒戰咬牙者。腎也。亦險也。治痘者。不可不知。

天花潰爛診治

天花所貴者。堅實不破。圓淨成痂也。其有潰爛者。乃火勝所致。經曰。火勝則肉腐。火之爲用。猛烈峻暴。近之則燥癢不寧。迫之則焦

痛難忍。灼之則靡爛成瘡。故敗物者莫如火也。凡痘瘡肌肉素虛。邪風侵襲。一旦毒發於裏。風應於表。風火相煽。肌肉憤填。皮膚決裂。而痘壞矣。如痘當膿成不靨時。以致潰爛。膿汁淋漓。不敢着席。粘惹疼痛者。宜用白龍散(61)裝盛絹袋。遍身撲之。或多佈席上。襯臥尤佳。如膿未成時。其毒未化。以致潰爛者。乃衛氣暴洩。津液不榮。危殆之症也。

天花陰囊發腫診治

天花陰囊發腫。痛如瓠瓜者。乃熱毒流入小腸也。宜用四苓散(69)治之。亦有厥陰肝經之熱。下注而發腫者。宜用平肝和中利氣之劑治之。則熱邪驅而榮衛和。腫痛自除矣。

天花落痂後浮腫診治

天花落痂後。如面目虛浮。久則一身皆腫者。此表氣不足。見風太早。風邪卽乘虛而入也。其治在肺。宜用胃苓湯⁽¹³⁹⁾治之。若腹覺不快利。而面目遍身浮腫者。宜用四苓五皮散⁽¹⁴⁰⁾治之。

天花眼目有變診治

眼目爲五臟之精華。五臟之精氣。上注於目。丹溪曰。目病屬風熱血少。夫天花蘊非常之熱。自裏而達於外。苟氣血虛弱。不能逐毒外出。則毒火內鬱。而血脈逆行。其毒斯入於目矣。况熱毒生風。肝應於目。故目病由茲而作焉。有赤腫而痛不能開者。有不赤不腫不痛。在黑暗處則能開。纔見明。則陽光燦之。淚自溢出。致不能開者。宜用洗肝散⁽¹⁴⁴⁾加蟬退治之。又有失調養治療。以致痘毒入眼者。其症多在收靨之時。或滿面痘瘡破爛。重復腫灌。而膿血膠固。

毒蒸內攻於眼。其毒入眼者。或痘出太密。成就遲緩。醫用辛熱之藥發之。亦令痘毒入眼。或收靨時。啖辛熱之味。俗謂之乾漿。以致二火相煽。亦能令痘毒入眼。生膜在白珠者。不必施治。久當自去。惟在黑輪上。或掩瞳人者。不可輕忽。宜急用望月砂散⁽¹⁴⁷⁾治之。尤不可輕用點洗之藥。致害及雙目也。

天花疔瘡口瘡診治

天花發後。若毒攻牙根。腐爛成疔者。此症殺人甚速。宜急用吹口丹⁽¹⁴¹⁾吹之。但須先以韭菜根。與老茶葉煎濃汁。用雞翎毛刷去腐肉。洗見鮮血。然後吹之。日三四次。四五日即愈。口瘡亦用此方。再加人中白搽之。如爛至喉中者。用細竹管將藥吹入。雖滿口牙齒爛落。口唇穿破者。皆能治愈。切勿輕視。

天花餘毒診治

大凡天花痂落之後。一有其症。則曰餘毒。不知餘毒之外。又有餘症。餘毒與餘症。原有分別。如結靨之時。有已成之瘡。綿延至今。肌肉不復。或發疥癩。或發癩瘡。或發疔疽。或發癰腫。或發目赤等。皆餘毒也。若或誤服藥劑。或外感風寒。或內傷飲食。或觸雜惡氣。或起居不時。外感六淫。內動七情等。所生之症。皆餘症也。治之要分別酌量。隨症施藥。方不至誤。蓋天花至此。已歷起脹。灌漿。收結。還元。五臟真氣。發洩已多。週身血氣。耗散已甚。雖或毒氣未淨。而其正氣已虛。故宜以補虛爲本。所因之病。以未治之。不可純用涼藥也。茲特分述於下。俾醫者有所參考焉。

一、天花痂落之時。有潰爛之瘡。其來日久。肌肉未復者。宜內服連

翹湯(46)加牛蒡子。外用生肌散(61)搽之。則潰爛自愈。

一、天花落痂後。毒氣留滯經絡。失於解利。致餘毒太盛。外不得洩於皮膚。內不得入於臟腑。聚而不散。遂發紅腫。而成癰。未成膿者。宜先於紅腫硬痛處。以銀針刺其根。令出惡血。然後以拔毒膏(89)敷貼。如已成膿。而未潰者。亦以銀針刺出其膿。勿使內潰。若已潰者。急用十全大補湯(28)加金銀花治之。

一、天花落痂後。如癰毒發於手足。委中曲也。而不散者。乃血氣凝滯於灣曲也。此處與他處不同。初起不可針刺。當以三荳湯料爲末。醋研如糊塗之。三荳者。乃大黑荳。赤小荳。菉荳也。

一、天花落痂後。如遍身肢節。有疔蝕瘡者。此因氣血虛弱。被風寒相搏於腠理。使津液澁滯。而然也。宜用綿繭散(148)（此散藥店

有賣茲補方於后）治之。

一、天花落痂後。遍身瘡癬。如疥如癩。膿水浸淫。皮膚潰爛。日久而不愈者。是毒氣散漫於皮膚也。可用百花膏(66)塗之自愈。

一、天花結痂時。如忽發丹瘤。紅腫作痛。流移上下。手不可近者。宜用生地黃湯(90)治之。

一、天花痂落後。有因餘毒而致目翳者。是由臟而達外。治之法。當活血解毒而已。活血不至於熱。解毒不至於寒。使五臟和平。則目翳自去。切不可輕用點藥。反致損睛也。

天花大全下篇

暨陽樓國榮纂

古今經驗諸方

厚按各方引之蓋係分干蓋與生蓋二種干蓋味辛大熱氣味俱

味辛氣溫氣味俱輕陽也能益脾胃散風寒治痰嗽止嘔吐凡痘不起發者俱宜用之夫痘原以氣血爲主二蓋既有如此功效故多賴之以和榮衛也至於清涼之方如竹葉石

膏湯等豈可妄用又各方藥味雖不註分量然前者爲君後者爲臣無形中已明定輕重矣至確實分量是在用者按症而施宜神而明之變而化之不能削足就履且亦非著書

者所應註致貽譏後世也

1. 電筒照法 用三百支光永備電筒。令病者坐於暗處。向兩額

貼近皮肉照之。以目邪視。則皮肉之色形俱可見矣。天花在起

發灌膿之時。用此法照之。則有無變化。俱可逆料。

2. 升麻葛根湯 葛根 升麻 白芍 甘艸

此方乃發表解毒。疏通氣血。升降陰陽之劑。蓋升麻能解疫毒。

升陽於至陰之下。以助發生之氣。葛根能解熱毒。兼疏榮衛。以導起發之機。再佐以甘艸。和在表之氣。佐以芍藥。和在裏之榮。使實邪盡驅。榮衛自和。故痘疹俱宜用之。誠良劑也。

3. 參蘇飲

老東參

蘇葉

桔梗

乾葛

前胡

陳皮

茯苓

苓

枳殼

半夏

甘艸

此發表安裏之方。因風寒客於外。用紫蘇乾葛以發表。痰嗽壅於內。用半夏陳皮等以安裏。邪去之後。中外必虛。故用東參甘艸急固其虛。使表和而痘易出。裏和而氣不虛。亦痘疹俱宜之方也。

4. 敗毒和中散

連翹

牛蒡子

黃連

枳殼

桔梗

紫草

甘艸

蟬蛻

川芎

前胡

木通

升麻

麥冬

如大便秘者加大黃

此清熱解毒疏利之方。無論表裏虛實熱者。皆可用之。

5. 清解散 防風 荆芥 蟬蛻 桔梗 川芎 前胡 升麻

黃芩 木通 連翹 山查 甘艸 加干薑 三片

此方有攻無補。乃表裏雙解。令痘毒發越之劑也。用者慎之。

6. 蘇解飲 防風 荆芥 蟬蛻 桔梗 川芎 前胡 乾葛

升麻 紫艸 牛蒡子 連翹 白芷 羌活 甘艸 加薑

三片

此解表疏利之方也。如內熱正作。忽爲風寒所襲。致鬱滯不行

者宜之。

7. 溫中益氣湯 高麗參 白朮 黃芪 歸身 茯苓 川芎

白芷 防風 木香 桂枝 山查 甘艸 加薑棗各三

枚

此方氣血雙補。疏通隧道。內木香官桂二味。用之以達四肢。直入經絡者。

8. 牛黃清心丸 牛黃 辰砂 黃連 鬱金 黃芩 山梔

共研細麵糊爲丸。黍米大。每服十丸。用燈心湯下。

9. 粉紅丸 胆星 辰砂 天竺黃 龍腦 胭脂

共爲末。用牛胆汁和丸。雞頭子大。每服一丸。用沙糖水化下。

10. 惺惺散 東參 白朮 茯苓 天花粉 桔梗 白芍 細

辛 炙艸

共研末每服二錢。

11. 三豆湯 大黑豆 赤小豆 菘豆 共煮爲湯。

12. 辟穢香 蒼朮 大黃 共研碎爐中燒。

13. 涼血化毒飲 歸尾 赤芍 生地 木通 連翹 牛蒡子

紅花 紫艸 桔梗 山豆根

此方歸芍生地紅花用以活血涼血。牛蒡子、紫艸、山豆根用以解毒化毒。桔梗雖爲舟楫之藥。然其味苦亦能令肺氣降而不滯。且利小便而殺其毒也。

14. 固陽散火湯 高麗參 黃芪 當歸 升麻 葛根 荊芥

穗 連翹 防風 生地 木通 甘草

此大補之劑也。加以防風。其力愈大。因黃芪戀防風。今得防風之力。以達於表。當歸生地連翹。又能清火涼血。升麻葛根荊芥。

乃散火之聖藥。木通利小便。與生地並用。則能解心熱。自小腸達於膀胱。熱隨溺出。有何火之不散也。

15. 九味神功湯 高麗參 黃芪 紫艸 紅花 生地 前胡

牛蒡子 白芍 甘草

華陀論氣尊血分者生。毒參陽位者死。夫氣宜尊於血分。故本方以參芪提其氣。使氣升而血附也。毒不宜參於陽位。故以紫草白芍行滯血。使血氣活動。則毒隨血氣而外行。又加紅花生地以活其血。且毒之所乘。以相火萃於陽明而作熱。故又以牛蒡爲佐。使解毒而止沸息薪。毒之所發。因風寒客於腠理而作熱。故更以前胡爲佐。使散其鬱而緩蒸去毒。配合之妙。洵有挽回造化之功也。

16. 清地退火湯 地骨皮 地膚子 牛蒡子 柴胡 紫草

乾葛 連翹 當歸 木通 蟬蛻 加薑三片煎服

此活血解毒之方也。如痘出而身發熱不退者用之。

17. 豬尾膏 取真正片腦。兒大者用一分。兒小者用半分。研末以

器盛之。將小豬割去尾尖。提起兩耳。令滴血數點於器內。白湯

和服。

18. 南金散 紫背荷葉 白殭蠶共爲末每服五分。用黃酒調下。

19. 雙解散 防風 川芎 當歸 白芍 大黃 連翹 石膏

桔梗 黃芩 白朮 桂枝 荊芥 甘艸 加干薑三片

煎服

此表裏兼治之方。凡痘瘡表裏俱實者。非此不能解也。

20. 豆蔻丸 肉豆蔻 木香 砂仁 龍骨 訶子肉 赤石脂

桔礬各七錢爲末。麪糊凡黍米大。每服三十丸。米飲下。

21. 活血散 當歸 赤芍 紫艸 川芎 紅花 血竭 木香

共爲細末。五歲者服一錢。十歲以上服二錢。好黃酒調下。

22. 平和湯 高麗參 當歸 桔梗 白芍 紫蘇 黃芪 防

風 肉桂 乳香 藿香 白芷 甘艸 加干薑三片煎服。

23. 薑附湯 白附子 老干薑各二錢濃煎服。

此開痰發散之劑也。

24. 調元化毒湯 黃芪 黨參 白芍 當歸 連翹 防風

荆芥 前胡 桔梗 木通 山查 紅花 生地 灸草

蟬蛻 加干薑三片共煎

此乃升補氣血。驅邪解毒之方也。若元氣與邪氣俱盛者。宜去參。芪。倍加木通。甘草用之。

25. 保元湯 別直參 黃芪 甘草 加薑三片

此乃神醫華陀之方也。古者用人參。現人參不易得。故改別直參。乃完全升氣補血。健肺和中之劑也。

26. 當歸活血湯 當歸 川芎 赤芍 生地 紅花 紫草

此活血涼血之方也。

27. 九味順氣湯 白朮 茯苓 青皮 白芷 陳皮 烏藥

黨參 木香 甘草

參草朮。補氣藥也。青陳白芷。理氣品也。木香烏藥。其氣溫。能行氣。且又芳香。能開竅。故九味皆氣藥。全無血藥之佐。純陽之

劑也。如痘黑乾枯者。不宜用此。切宜慎之。

28. 十全大補湯 黨參 黃芪 當歸 白芍 白朮 茯苓

生地 川芎 肉桂 甘草 加薑三片。棗三枚共煎服。

29. 參苓白朮散 黨參 白朮 藿香 木香 乾葛 茯苓

甘莫 加干薑三片煎服。

30. 胭脂塗法 升麻一味煎濃湯去渣。加胭脂於湯內。出紅汁。卽以棉花蘸湯。於瘡上拭之。此和血敗毒之藥也。如痘不起者。熱拭之。

31. 桂枝葛根湯 桂枝 葛根 赤芍 升麻 防風 甘草

加干薑三片煎服。此方用桂枝引諸藥達四肢。透經絡。能令氣調而血活。氣血活動。則痘毒自無壅遏之患矣。

32 十宣散 黨參 黃芪 當歸 厚朴 桔梗 桂心 川芎

防風 白芷 甘草 共爲細末。每服一錢或二錢。木香湯調下。此亦調和氣血。開放腠理。令毒不致留滯之方也。

33. 水楊湯 用溪邊水楊柳。入長流水煎六七沸。然後入盆內。其

熱度約華氏表九十度。令患者脫去衣服。就盆洗浴。切勿見風。

34. 快癍湯 高麗參 當歸 防風 木通 木香 紫草 蟬

脫 甘草 共煎服。

35. 黃芪建中湯 高麗參 黃芪 桂枝 白芍 甘草 加干

薑三片煎服。又棗三枚。此建立中氣。使其生育榮衛。而通行津液之方也。

36. 羌活湯 羌活 川芎 防風 梔子 龍胆草 當歸 薄

荷 淡竹葉 甘草

此散邪清熱之方也。有胆草引之入肝經。又可清肝經之熱。

37. 羌活防風湯 羌活 防風 升麻 柴胡 當歸 川芎

細辛 蔓荊子 黃芩 甘菊花加薑三片

38. (一)羌活救苦湯 羌活 白芷 川芎 蔓荊子 防風 桔

梗黃芩 大力子 連翹 升麻 人中黃 各等分

用法 剉碎加薄荷葉七片。清水一盞。煎至七分去渣溫服。

38. (二)獨聖散 穿山甲 麝香共爲末。用三五年大雄雞刺其冠

取血。加酒調服。

39. 瀉黃散 藿香葉 梔仁 石膏 防風 甘草 共爲末。加

蜜酒調服。每次三錢。

40. 四聖散 菘豆 豌豆 珍珠 頭髮

以上二豆。各四十九粒。燒存性。珍珠二分。煨髮燒灰。共爲末塗之。

41. 加味保元湯 高麗參 黃芪 歸尾 赤芍 紅花 黃芩

牛蒡子 黃連 升麻 連翹 防風 荊芥 甘草

此補氣活血解毒散火之方也。

42. 涼血解毒湯 當歸 白芷 升麻 紫草 紅花 赤芍

桔梗 連翹 加燈心一束引

此破血活血解毒之方也。凡血不行。結滯鬱熱者宜之。

43. 胡荽酒 胡荽一束切碎。用好黃酒共煎。勿令洩氣。可噴床褥。

44. 通幽湯 當歸 紅花 生地 熟地 桃仁 升麻 麻仁

甘草

此潤燥下利之方也。按胃之下口曰幽門。此方服之。可以通胃留滯。故曰通幽也。

45. 胆導法 用豬胆壹個。另用鵝毛管一支。兩頭截去。一頭插入胆中。用線紮定。吹氣令滿。然後納入穀道中。約五分鐘。待氣通取出。

46. 連翹湯 連翹 防風 瞿麥 荆芥 木通 車前子 當

歸 柴胡 蟬蛻 梔子 赤芍 滑石 甘草

此解裏熱。利小便之藥也。前人云。小熱則清解。大熱則利小便。此方是也。

47. 牛李膏 取牛李子。不拘多少。石器中舂汁熬膏。每服四錢。

48. 通關散 山梔 大黃 車前 木通 赤茯苓 滑石 扁

蓄 東參 瞿麥 炙草 加燈心一束共煎服。

49. 陳氏木香湯 木香 大腹皮 東參 半夏 青皮 肉桂

前胡 赤茯苓 丁香 訶子 甘草 加薑三片。

50. 異攻湯 木香 當歸 茯苓 肉桂 豆蔻 陳皮 丁香

半夏 白朮 厚朴 附子 加薑三片。

51. 理中湯 高麗參 白朮 甘草 加干薑三片

此理胃中虛寒。或誤服涼藥。致瀉而手足厥冷之良方也。

52. 紫草飲 紫草茸 黨參 山查 蟬蛻 枳殼 穿山甲

木通

此方以紫草爲君。紫草味苦氣寒。能利九竅。若心經有熱。閉塞

不通。血氣凝滯。痘瘡色紫或陷者。必用之。

53. 茵陳薰法 用干茵陳爲末。搗棗肉爲丸。如鷄蛋大。晒乾。烈火燒烟薰之。

54. 無價散 用人猫猪犬糞。冬月內燒爲灰。以砂糖水調服。

55. 內托散 黃芪 黨參 當歸 川芎 桔梗 厚朴 白芷 木香 肉桂 防風 甘草 加干薑大棗各三枚煎服。

此治表虛裏實。氣血皆弱之方也。

56. 參歸鹿茸湯 鹿茸 黃芪用炙 當歸 炙艸 別直參 加生

薑三片 桂圓肉三個共煎服。

57. 千金內托散 高麗參 歸身 炙黃芪 白芍 川芎 肉

桂 山查 防風 白芷 厚朴 炙艸 加生薑三片 桂圓

肉三個共煎。

58. 清毒活血湯 紫草茸 當歸 前胡 木通 牛蒡子 生

地 白芍 連翹 桔梗 黃芩 山查 生黃芪 甘草

加干薑三片。

59. 鹿茸酒 選二、三寸真茸壹兩。用酒煮約三十分鐘。然後去皮

再煮。約一點半鐘。令極爛爲度。以布攪過。再將皮揉爛。化在酒內。

60. 安神丸 辰砂 龍腦 牛黃 共爲末。用豬心血和丸。如菘

豆大。每服一丸。

61. 白龍散 牛糞煨灰。以絹袋包之。遍撲痘上。

62. 快癍越婢湯 黃芪 桂枝 防風 白芍 炙艸 加干薑

大棗各三枚。

63. 甘桔湯 甘草 桔梗共煎。

此清肺熱。利胸膈。療咽喉腫痛之方也。

64. 敗草散 屋上陳茅草取淨者爲末摻之。

65. 天水散 滑石 甘草 滑石四兩甘艸一兩共爲末調塗。

66. 百花膏 石蜜不拘多少。略用湯和。以鵝翎刷之。

67. 溫表調中湯 炙黃芪 東參 白朮 茯苓 官桂 川芎

歸身 白芷 丁香 附子 炙艸 加干薑六片煎服。

68. 回天飲 砂糖半盞或滾水一碗調溫服。

69. 四苓散 白朮 茯苓 豬苓 澤瀉共煎服。

70. 當歸解毒湯 當歸 生地 大黃 麻仁 枳殼 紫草

連翹共煎服。

71. 清表散毒湯 地骨皮 麥冬 天花粉 連翹 牛蒡子

豬苓 澤瀉 黃芩 木通 甘草

72. 回漿散 首烏 白芍 黃芪 黨參 白朮 茯苓 甘草

加干薑三片。

73. 除濕湯 羌活 蒼朮 防風 赤茯苓 豬苓 澤瀉 木

通 白朮共煎服。

74. 桂枝解毒湯 豬苓 澤瀉 木通 地骨皮 麥冬 黃芩

桂枝 甘草共煎服。

75. 五苓散 澤瀉 白朮 赤茯苓 豬苓 肉桂 加姜棗各

三枚煎服。

76. 白虎湯 石膏 知母 甘草 加糯米一撮煎服。

77. 宣風散 檳榔 陳皮 甘草 牽牛 共爲末。

78. 小柴胡湯 柴胡 黨參 黃芩 半夏 甘草 加干薑大

棗各三枚煎服。

79. 蕎麥粉 痘瘡潰爛者以絹袋盛粉撲之。

80. 清金導赤飲 當歸 白芍 陳皮 貝母 黃芩 石膏

茯苓 黃連 杏仁 桑白皮 枳壳 木通 滑石 車前

元參 黨參共煎服。

81. 四君子湯 高麗參 白朮 茯苓 甘草 加干薑大棗煎

服。

82. 象牙散 黨參 白朮 黃芪 茯苓 首烏 甘草 象牙煨

加糯米炒焦一撮。大棗二枚。

83. 大連翹飲 連翹 防風 荆芥 牛蒡子 當歸 柴胡

車前 黃芩 蟬蛻 木通 滑石 甘草 加薑三片煎服。

84. 清神湯 高麗參 黃芪 當歸 白朮 陳皮 棗仁 黃

連 茯苓 甘草 加大棗三枚。糯米一撮。共煎服。

85. 荆防敗毒湯 荆芥 防風 柴胡 黨參 桔梗 川芎

茯苓 枳殼 羌活 獨活 甘草 加薄荷五葉煎服。

86. 固肌湯 高麗參 黃芪 當歸 蟬蛻 炙草 加糯米一

撮煎服。

87. 竹葉石膏湯 石膏 竹葉 知母 麥冬 甘草

88. 解毒內托湯 黃芪 當歸 防風 荆芥 連翹 木通

金銀花 赤芍 甘草

89. 拔毒膏 馬齒莧 石蜜 菘豆 赤小豆 加豬脂熬成膏

塗腫處。

90. 加味小柴胡湯 柴胡 黨參 黃芩 生地 半夏 炙草

加生薑大棗各三枚。

91. 防風解毒湯 防風 地骨皮 黃芪 白芍 荊芥穗 牛

蒴子共煎服。

92. 蟬蛻散 蟬蛻 蜜蒙花 黑豆壳 菘豆壳 夜明砂 共

研末每服一錢。

93. 四物湯 當歸 熟地 白芍 川芎共煎服。

94. 洗肝明目散 當歸 川芎 羌活 防風 梔子 胆草

柴胡 密蒙花 共爲末。每服一錢。用砂糖水調下。

95. 大補湯 別直參 當歸 黃芪 炙草 川芎 桔梗 防

風 白芷 厚朴 紫草 南木香 加姜三片煎服。

96. 十三味敗毒散 當歸 白芷 穿山甲 忍冬花 防風

乳香 陳皮 赤芍 貝母 天花粉 皂角刺 沒藥 甘

草 共煎服。

97. 升天散 黨參 白朮 黃芪 當歸 川芎 陳皮 山查

淫羊藿 穿山甲 肉桂 甘草 加干薑大棗各三。

98. 消毒飲 牛蒡子 連翹 升麻 紫草 山豆根 甘草

共煎服。

99. 八正散 滑石 瞿麥 扁蓄 大黃 木通 車前 梔仁

甘草 加燈心一束。

100. 導赤飲 生地 木通 炙草 淡竹葉 共煎服。(按導赤

飲有二方。古方再加人參麥冬淡竹葉七片。此方係專利小便

清熱之方。使丙丁之火由溺而洩者也。故書中採用時。外加何

藥。皆經註明。)

101. 大柴胡湯 柴胡 芍藥 枳殼 黃芩 大黃 共煎服。

102. 承氣湯 大黃 厚朴 枳實 芒硝 甘草 加干薑三片。

103. 百祥丸 青州棗三十個
去皮核 紅牙大戟去骨
一兩 用水一盞。共煎。俟水盡。去

大戟不用。將棗搗為丸。用木香湯送下。

104. 解毒散 金銀花 防風 荊芥 木通 連翹 牛蒡子

甘草 加酒半盞煎服。

105. 加味清肺飲 黨參 柴胡 杏仁 桔梗 芍藥 麻黃
半夏 旋覆花 阿膠 知母 桑白皮 烏梅 甘草 加
薑葱煎服。
106. 黃芪湯 黃芪 黨參 當歸 川芎 白朮 紅花 山查
甘草 加薑三片。
107. 加味四聖散 紫草茸 黃芪 木通 黨參 川芎 蟬蛻
甘草 共煎。
108. 排毒散 大黃 白芷 穿山甲 歸尾 沉香 木香 共
煎。
109. 二陳湯 陳皮 半夏 茯苓 甘草 共煎。
110. 羌活當歸湯 羌活 獨活 當歸 防風 柴胡 川芎

黃柏 桃仁 紅花 加酒煎服。

111. 敗毒散 羌活 獨活 柴胡 川芎 枳壳 桔梗 黨參

薄荷 甘草 加薑三片。

112. 桂枝大黃湯 桂枝 大黃 白芍 甘草 加姜煎。

113. 芍藥防風湯 白芍 陳皮 升麻 防風 川芎 桔梗

甘草 加薑棗煎服。

114. 平胃散 蒼朮 厚朴 陳皮 甘草 加薑棗煎。

此治脾經濕滯之方也。如脾土不足者慎用。

115. 枳壳散 枳壳 生地 紫草 大黃 共煎。

四聖湯 紫草 黃芪 木通 甘草 煎服。

117. 小無比散 硃砂 片腦 麝香 牛黃 共研細末。一歲兒

服一分。大者五分。用猪尾血調下。

118. 參歸清膈湯 黨參 柴胡 白芍 當歸 知母 白朮

地骨皮 紫苑 茯苓 桔梗 滑石 甘草 加姜煎服。

119. 四順清涼飲 當歸 白芍 大黃 甘草

120. 安神丸 歸身 黃連 麥冬 茯苓 甘草 辰砂 龍腦

共爲末。猪心血和丸黍米大。每服十丸。燈心湯下。

121. 柴苓湯 此卽小柴胡湯合四苓散也。

122. 寧神湯 黨參 當歸 生地 麥冬 梔仁 石菖蒲 辰

砂 炙草 加燈心煎。

123. 抱龍丸 方古 天竺黃 胆星 辰砂 雄黃 共爲末。甘草膏

爲丸。如芡實大。每服一丸。燈心湯下。

124. 補中益氣湯 高麗參 黃芪 當歸 白朮 陳皮 柴胡

升麻 甘草 加干姜三片。棗三枚。煎服。

125. 麥冬湯 麥冬 黨參 乾葛 赤芍 升麻 石膏 甘草

126. 葛根解毒湯 葛根 天花粉 麥冬 生地 升麻 甘草

加茅根煎服。

127. 參麥湯 高麗參 麥冬 葛粉 升麻 白朮 甘草 加

糯米一合。竹葉七片。同煎。

128. 髮灰散 取男女亂髮。用皂角煮。洗淨油氣。然後焙乾。煨成灰。

研末。每用二分。用童便酒調服。

129. 清肺湯 天花粉 麥冬 桔梗 當歸 知母 丹皮 白

芍 黃芩 甘草

130. 犀角地黃湯 犀角 芍藥 生地 丹皮 煎服。

131. 加味鼠粘湯 桔梗 射干 山豆根 防風 乾葛 鼠粘

荆芥 共煎服。

132. 黃芩湯 黃芩 白芍 炙草 加棗三枚。

133. 益黃散 陳皮 丁香 青皮 訶子 甘草 共為末。每服

二錢。水調下。

134. 阿膠住車丸 當歸 黃連 干薑 共為末。用阿膠壹兩。共

和為丸。如桐子大。每服二十丸。食前米飲湯下。

135. 薤白散 薤白 豆豉 梔仁 共煎服。

136. 柴葛桂枝湯 柴胡 葛根 桂枝 防風 白芍 黨參

甘草 加薑三片。

137. 加味犀角湯 犀角 牛蒡子 荊芥 防風 升麻 桔梗

麥冬 甘草

138. 五皮湯 桑白皮 地骨皮 生薑皮 大腹皮 五加皮

加燈心煎服。

139. 胃苓湯 豬苓 澤瀉 茯苓 白朮 蒼朮 厚朴 陳皮

桂枝 甘草 共煎。

140. 四苓五皮散 白朮 茯苓 麥冬 黃芩 大腹皮 桑白

皮 生薑皮 茯苓皮 陳皮 豬苓 澤瀉 木通 滑石

甘草

141. 吹口丹 黃連 青黛 兒茶 片腦共爲末。

142. 擦牙散 銅綠 雄黃 五倍子 枯礬 白礬 烏梅 細

辛黃連 共爲末。

143. 甘露散 生地 熟地 天冬 麥冬 石斛 茵陳 甘草

加枇杷葉共煎。

144. 洗肝散 川芎 歸尾 防風 羌活 薄荷 梔子 甘草

145. 地黃湯 熟地 當歸 防風 羌活 蟬蛻 木賊 穀精

草 元參 蒺藜 黃連 大黃 炙草 加犀角少許。

146. 龍胆湯 龍胆草 菊花 蒺藜 白芷 黃連 蟬蛻 木

賊 共煎服。

147. 望月砂散 穀精草 密蒙花 蟬蛻 望月砂 共爲細末。

用豬肝一兩。以竹刀批破。加藥於肝內。煑食之。

148. 綿繭散 用出蛾繭殼十個。以白礬填滿。燒之。汁出成灰。爲末。

常識叢書

世界醫藥之新發明 丁錫康編 一冊六角

醫藥之學，日有進步，昔日之認某藥爲某病之聖劑者，今日或以爲無用矣。本書對於近世各國醫藥之新發明，敘述頗詳，凡一種藥物之性質、功用、方法、及世界名醫實驗後之批判，均搜羅比列，使讀者有明確的瞭解。凡從事醫藥事業者，固應人手一編，即欲獲得相當之醫藥常識者，亦不可不備也。

細菌與人

張東民編 一冊二角

本書編者爲美國密爾登大學生物科學士，曾任美國 *Batte Creek Sanitarium* 細菌化驗師，對於細菌研究有素。書中分述細菌通論，與夫農業、工藝、疾病、健康、自然界等之關係。讀之、對於細菌之真相，可以澈底明瞭，而於區別、利用、預防、撲滅等常識，亦多所述及。

